

王文安公詩文集

王文安公文集卷之五

男祐編集

碑銘

道錄司左正一吳公墓誌銘

太宗文皇帝臨御天下以纂輯釋道二經大召僧道至京師而南昌玄妙觀道士吳公大節應召而來時永樂十七年也明年授道錄司左至靈主管洪恩靈濟宮洪熙紀元之初陞右演法宣德間建朝天宮于城西詔大節經畫其制宮成命為住持

皇上嗣登太寶陞左正一仍兼朝天宮住持領天下道教初大節脩經典四方羽士雲集而討論攷索纂述類聚

悉屬於大節為朝廷所重自是國有祈禱必命之嘗設  
醮於武當及閩中所至精誠孚達多有感應大節性和  
厚以恬淡自守京師人皆敬慕而志愈謙退非趨朝未  
嘗出城市作西深堂于宮之西終日焚香端坐讀儒書  
味老氏之言又作清真觀于王泉山之麓樂其地幽勝  
命其徒王希言居之間往遊適登山臨流徜徉吟詠其  
志超然出於俗塵之外也大節世居鍾陵父某母魏氏  
大節幼穎異不樂居市井父母令師事郡道官吳文禎  
由是勵行勤學博覽群書於道家所謂三洞四輔清微  
靈寶之秘尤得其蘊奧著山西壁二真人授以上清經

籙之秘既掌道教祇事

四朝寵賜彌厚不自矜喜接人待物從容和樂學道之士  
未有踰於大節者也正統壬戌三月戊寅忽微疾語弟  
子曰當逝矣甲申沐浴衣冠而坐乙酉脩然而逝訃聞  
上遣官賜祭弟子楊某等奉冠劍歸葬南昌之山大節臨  
終手自致書以墓表請於尚書胡公而右至靈顏公與  
其徒李獨清謂予知大節以狀來請銘乃叙次如右而

銘曰

吳公於道極探索葆和守冲道斯得入朝拜恩領道職  
倏然仙去何所適浮雲孤鶴海天碧劍履歸瘞故山側

刻銘茲文示無數

彭城伯張公墓誌銘

公諱輔姓張氏奉國翊衛保義武臣特進榮祿大夫柱  
國彭城伯贈彭城侯謚恭靖麟之子奉天翊衛宣力武  
臣特進榮祿大夫柱國彭城伯景之父中軍都督昇之  
從子也張乃河南永城大族累世積善名德顯著而恭  
靖公惇仁信尚禮義又以征討建功慶善之隆勲烈之  
茂垂裕于後益久而盛大繼以公之簡重端實弘衍其  
慶母夫人某氏柔靖有德公生而穎秀及長巍然有立  
志氣超邁兄弟八人而公為長事二親孝友諸弟恭待

宗族以義接下人雍容謙遜未嘗見其疾聲厲色所居  
列圖書琴棋以自適不好華飾驕傲靡侈之習無犬馬  
聲音之樂以疾步履不出于外而教子瑾讀書脩身其  
言諄諄然瑾既襲爵

朝廷推恩封公彭城伯娶孫氏封夫人正統四年七月六  
日卒年四十

皇上以公國戚賜祭命有司治墳于香山之壽安原葬以  
是年十月子一人瑾也女三人嗚呼公處富貴榮盛而  
執德有恒恬然無欲其賢如此非有所自乎瑾以狀來  
請銘銘曰

赫矣張氏遠有代序永城之族昌大蕃庶世多名人積  
善樹德迨于恭靖益厚其積福慶來萃先以其時高門  
大閤奕奕巍巍惟公之生至德淳恪不驕不肆孝敬恭  
讓夙有微病翼然家居左琴右書日以自娛嗣封彭城  
公有令子云受寵命聖恩所畀祿養方隆乃遽損棄香  
山之陽有崇新阡磨礪堅石鐫刻銘詞示公後人尚永  
其思

浙江僉事劉公墓誌銘

永樂辛丑春浙江按察僉事武岡劉公以老還鄉作別  
墅於其邑之安濟橋南日優游安居宣德丁未驛召至

京欲用之公力辭而歸後八年乙卯九月二十日以疾卒享年七十有六其子順舉賢良方正在京師聞訃哀慟匍匐南歸奉監察御史劉敬所述行實來請銘予素知公誼不可辭乃按狀叙而銘之公諱必榮字懋德其先江西泰和人仕于湖廣者因居武岡祖世成父添輔俱有德而隱母孫氏公生而穎敏為郡庠生能力於學充貢入肅監知名六館超擢浙江按察僉事賜襲衣銀帶俾馳傳之任時洪武甲戌也公清介有為憲紀大振以事謫安東有薦其廉能者起為寧夏河渠提舉考滿改廣東鹽課司提舉為同僚所累謫戍玉田時金華



知府方素易亦在謫中公與之游以耕讀為樂遷謫殊  
不介意求樂成子以薦還京試事于兵部尋督軍需往  
浙江諸處至公無私事皆先集尚書方公言其能命同  
扈從北京尋往河南視水災還朝授鴻臚寺左少卿往  
交趾諭陳季擴是時素易亦起在朝俾與公同行至交  
趾季擴已遠竄海島有言不可往者公曰奉命招諭反  
叛艱危死生非所當慮乃踰東都越虞江凡二千餘里  
至其巢穴先令人言

朝廷寬仁招安之意季擴聞之奔走出迓公敷陳上德開  
諭禍福詞語婉切季擴稽首向化遣人奉表貢金及方

物謝罪公還季擴贈黃金百兩及綺帛諸物公固却弗獲  
歸而悉獻于朝會有洪武間遷謫者雖用當仍復謫所  
上特留公弗遣已而復舊職浙江僉事同給事中傅安使  
哈烈諸國凡三往皆稱使職受賞賚甚厚復與指揮毋  
撒使乞兒吉思之地其酋知公名莫不加敬焉公屢使  
外番不憚勞苦紀其山川風土習俗甚詳而珍奇玩好  
之物一無所取也公貌蒼古性端介與人交以信義所  
得賜物悉以賙親故之貧者自少至老喜讀書史不好  
華侈不喜釋老不惑妖邪嘗有闔門邁疾人以疫癘請  
召巫禳之公曰此寒暑不調所致何厲之有以藥療之

皆愈子長篤教之凡鄉人子弟相見必語忠孝仁義其  
卒也無少長皆哀之以正統元年正月二十四日葬于  
萬安鄉娶周氏元辰州路總管材夫之女也有淑德子  
二蒙郡庠生領湖廣乙卯科鄉薦第五人願其次也俱  
俊偉能嗣公之志女二翰林侍講王洪重慶知府孫曰  
良其婿也孫男二孫女三二女歸王與孫皆為繼室而  
王氏女寡無子且家素貧前室子錫公勸之讀經武閣  
學者遂舉為訓導而錫之弟欽俾侍母以居且厚給之  
恩若至親人人稱公之德也嗚呼公之才學操行如此  
論者惜其未盡於用然剔歷四朝身膺厚寵名播絕域

公亦顯榮矣沒而後何憾哉墓宜有銘以昭其休光銘  
曰

憲憲劉公有學有才爰授顯職出舍外臺既弘其施宜  
奮而踣終乃超騰恩命屢錫乘彼四牡載驅載馳銅柱  
之南流沙之西招降逋寇撫諭蕃酋既稱使命亦勤諏  
公之聲譽久播遐裔公之操履敦尚信義歸而歸休知  
足知止名位得失非公之志公其亡矣誰不悼惜高山  
崇崇闕此左宅伐石刻銘昭其德輝宜公子孫百世有  
思

鄧宗器先生壽藏銘

雲林鄧先生宗器自述其家世之詳而請予曰古之人  
有生而自為挽詞與荷鍾而隨者以獲終其天年為幸  
吾老矣此其甚所願欲者乃預為一丘為壽藏以待吾  
夫婦終老焉請予為之銘予與先生為通家深相知竊  
歎先生之心無所係累而達於死生之道如古人之賢  
者銘曷敢辭按鄧氏世居金谿之雲林其地有三十六  
峯之奇恠聳特五季時有諱師郊者自番陽來見其地  
之勝而家焉五世祖雲建炎中起民兵討平苗傳劉正  
彥以功授世襲統領自是鄧氏多文武才傑而雲林為  
名族矣先生曾祖諱文新祖諱自昭父諱輝世守清白

弗仕母陸氏象山先生之六世孫女先生之所自述者也先生諱璉宗器其字早失怙家貧奉母力學先世多遺書環居有田數十畝朝出力耕暮歸讀書與弟宗電相切磋足跡未嘗到城郭晚歲棄農圃授徒里中從學者多所造就有司屢欲薦之輒固辭鄉人甚高先生之行配李氏諱順正盱江先生邁之裔孫事舅姑孝敬理其家以儉以勤姻族内外交贊其賢此則予之所知也先生生己亥九月八日孺人生辛丑三月三日子二人俱夭女三人存者二壻則傳端李寶也先生性醇直博古能文有詩集若干卷壽歲在流源先隴之次銘曰

古有達士曠不羈視死之樂其如歸先生制行是古師  
學可致用蓄弗施自云老矣奚戚悲經營斯立待全歸  
厥配有德其布常歿則同穴禮所宜流源之山環以溪  
白石齒齒羅水湄先生壽當及耄期乃礪其石鐫銘詩  
故陳處士墓誌銘

陳故大姓累世貴顯漢戶牖侯平太丘長寔唐禮部尚  
書叔達右補闕集賢院大學士兼功業譽望垂耀簡冊  
而兼則宜都王叔明之後也曰盱世居江州旺之孫崇  
御史大夫崇始條畫家訓一門同居崇之後世守其訓  
南唐時旌其門曰義門宋初時食指凡千餘蓋敦孝義

太宗嘗以御書褒之由是天下稱江州陳氏矣其後有  
諱待宦遊于撫因家于金谿待之三世孫仲登咸淳進  
士累官樞密副使兼蘆州軍民宣撫使及卒奉勅葬于  
江州之孝義鄉仲之四世孫即處士也處士之祖良友  
任星子縣典史父伯剛樂善好義母孺人周氏處士幼  
承家訓介直尚氣節通書史大義父以誼誤謫戍遼海  
處士居家奉母盡孝敬而維持門戶卓然有立益廣其  
田宅處宗族以睦教子詩書鄉人有鬬爭必為解紛所  
言懇懇皆孝弟忠信未嘗有他語人皆敬讓之忽得疾  
語子曰吾當不起矣家世江州孝義之後汝曹幸無忝



前人又陳列家事命書之以遺子孫俟書畢乃具衣冠  
拜家廟與長幼辭訣脩然而逝時洪熙乙巳六月朔日  
也生洪武乙卯六月十四日年五十有一娶張氏有婦  
德子五人曰昌曰哲曰碧曰璠曰珍俱俊偉向學孫男  
十人孫女五人處士卒昌懋遷于外哲奉邑士周彥充  
之狀而請曰以宣德戊申十二月庚寅日葬吾父於柘  
埠幸先生賜之銘予與處士居同里素聞先世以義聚  
為名家又雅重處士淳謹有德銘不可辭况以哲之有  
請耶銘曰

奕奕陳宗代多顯人為公為卿高冠大紳江州之居實

自旺始旺孫御史敦厥孝義垂訓子孫聚居一門孝義  
允著休聲播聞金谿之遷待其肇之繼以樞副有譽于  
時既歷四世粵惟處士星子之孫伯剛之子侃侃循循  
克篤先訓惟孝惟友制行淳謹卓矣令德孚于鄉閭曾  
未上壽奄焉云徂臨終之言神識弗昧宜爾後嗣不忘  
所遺佚石于山刻茲銘詩昭哉厥德百世永垂

故處士張君墓誌銘

台之臨海有處士張君焉先世居黃岩至其大父達善  
仕為平江路提舉始徙家臨海居其邑之會通坊提舉  
子彥性元武邑縣尹為處士之父武邑之配狄氏生子

四人而處士其最次者也處士諱道允字仲信天性謹厚不為詭隨之行而力本好善元季播遷于外家產盡廢亂定歸復故業而二兄相繼歿一兄待武邑君在宦所處士獨奉母家居篤行孝道而二寡嫂及諸從子皆皤然處士力能扶持之是時武邑君雖仕久然素清介未嘗有錢帛歸遺子孫處士亦能自守淡泊不干譽於人故其鄉之士稱武邑君賢且謂處士克肖也既武邑君亡處士家產雖薄然葬祭必盡禮而勵其行逾謹恒以累世仕宦不可墜厥緒遣長子郇補郡學弟子負從明師授經永樂乙未郇登進士第擢兵部武選主事處士

乃甚喜自是享有祿養優游於晚歲矣宣德丙午十一月十七日無疾而終壽七十有九配周氏慈惠勤儉克相處士子三人長郤次郤郁女二人嫁為名族婦孫男七人匡匡安匡琯琬玉孫女三人皆在室郤奉其同年進士刑部主事李茂弘之狀來徵銘以 年 月 日葬處士于邑西義城之原郤之誡南宮也予忝較文及其仕于朝常往來相知竊喜其通敏有才識則處士之賢可知也銘烏得辭銘曰

臨海名族世顯貴倬矣處士繼厥美克篤孝友迪信義謂其有蓄以弗施養獲豐祿及暮齒溘焉今終福所萃

義城之原玄室闕刻銘堅石垂永世

大明故昭勇將軍指揮使陳公暨孺人張氏墓碑  
銘

在昔

太宗文皇帝以聖神文武之德興仁義之師芟除姦回肅  
清朝綱賢俊雄勇之士如雲龍風虎翕然而萃相與戮  
力效謀克成大勲論功定封五等之爵為列衛之將者  
皆偉哉其人也若指揮使陳公是已公諱敬字惟中世  
居河南之陳州曾祖諱志祖諱興父諱三世皆以忠  
厚見稱母夫人氏公生而狀貌奇偉幼有術者見之

曰是兒骨相非凡必為名將子孫富貴相繼及長好讀書有膂力騎射無有過之者洪武癸亥應募從我以壯勇充飛虎衛隊長從大將征金山至捕魚兒海師還駐大寧公首率衆從

上征討取廣昌收蔚州攻大同戰白溝濟南冒犯矢石奮不顧身所至無不克捷繼攻東昌圍滄州夾河藁城之戰靈壁肥河之捷公輒突陣而前斬獲居多

上正大位定賞陞公邳州衛指揮同知賜以誥命永樂庚寅征迤北追本雅失里抵平湖山敗阿魯台之衆凱還陞指揮使命公與都督劉江鎮遼東公忽得風疾歲勸

公辭勿往公毅然變色曰受君命而辭豈忠乎明日陞  
辭踴躍上馬而行中途疾劇舁還家而終焉疾革厲聲  
大呼曰天不使吾效尺寸之功立名萬里之外以報上  
之大恩其命也耶語畢而終永樂戊戌三月十二日也  
年六十有二厝於居庸山之陽配張氏封淑人後公二  
十七年為正統乙丑正月十五日卒壽八十有四子信選  
公之柩與淑人合葬通州城之西隅淑人諱法妙字淑  
真事舅姑以孝奉蒸嘗以敬待姻族以義相其夫勤而  
有禮恒語公曰惟盡誠立功名家事勿憂也既貴持身  
以清儉教子以禮義人稱為賢母云子二人長恕襲指

揮使調寧邊衛卒于疾信其次也勇而好文富於才畧  
嗣公之職聲譽愈著以薦

朝廷賜勅書命鎮守通州書撫士卒陞都指揮事階三品  
貴顯矣而篤於孝思奉狀以碑銘為請嗚呼公以武勇  
致身官至衛使老而其志愈壯雖鎮邊之功未遂而平  
生勲烈可以大書且有子能大振厥聲刻銘垂休於公  
惟宜銘曰

文皇神武昭大功恭行天討除姦兇當時英俊紛來從猛  
若貔虎惟陳公馳馬仗劍礪雕弓一身百戰當先鋒斬  
俘敵衆無遺踪策勲進秩寵任隆度遠未至乃令終相



以賢配德在躬同歸吉兆慶澤鍾子為都閫才且雄通  
城西隅岡阜重樹碑墓道何穹崇公之勲德垂無窮

教諭吳君墓表

梓潼縣學教諭吳君存淵既卒其子舉善來京師泣丐  
予文以表諸墓君嘗與纂脩入秘閣故得相與為友誼  
不獲辭謹按君諱寧存淵其字也吉之泰和縣西平里  
人曾祖諱叔啓從宋丞相信國文公倡義起兵于鄉祖  
諱善可父諱仲珪皆讀書為善君生十歲而孤穎敏好  
學元末奉母避亂入山谷叢書自隨亂平歸從鄉先生  
唐棐學通毛氏詩歲授徒里中以養其母尋為縣學弟

子中洪武癸酉鄉舉明年下第入太學交游皆天下之士由是知名用薦與監察史御巡按以介時見稱既還朝賜襲衣鈔錠又明年年遂有梓潼之除梓潼多山谿生徒好馳騁射獵君至為立規以詩書禮樂為教人皆化之會廣元縣學宮闕負大府命君攝之居數月生徒翕然尊為明師永樂丙戌

天子大召天下文儒纂脩大典君被召至京與編摩凡六年而成詔賞賚還職君喜曰此行溯大江而上一歸拜老母榮幸莫大焉時君之母年已八十餘矣君既歸士大夫皆喜而亡賴者訐其枉道有司論違例當杖詔宥

之復還梓潼北至聞母喪以憂還家竟哀毀成疾明年  
二月卒春秋五十有九葬里之太龍山君娶陳氏子二  
人舉善止善女一人孫男二人於戲君可謂孝友君子  
也歟自幼孤時跋涉艱危奉其母而未嘗罹盜賊之害  
及得時而仕母且老矣幸得

朝廷寵賚以歸而榮之而人反構其非披獨何心哉天下  
之善為人子者固如是乎幸蒙寬宥之典使其志顯白  
無貽憂於母而終以壽攷君雖沒也復何憾哉是宜表  
暴以勵夫世之薄者故為書其賢俾刻之墓隧焉

故給事中王君仲恒墓表

故給事中王君諱常字仲恒世為金谿儒家故同門真  
外郎經之從孫隱士季思之子也母夫人張氏娶何氏  
子麟女三人居癸丑正月初六日自幼穎敏與余同游  
鄉校已蘄然出衆年十七去為府庠生讀書明大義臨  
川黃丞者素貪暴且無禮諸生君嘗至丞私第欲面折  
之丞謝病不出一日乘馬過市中適與君遇君止其馬  
大聲白其過惡數事丞下馬愧謝欲曳入白太守左右  
勸止之丞由是怏怏竟去官君屢試大府不利益奮勇  
為學洪武三十三年充貢為太學生今

天子即位改元永樂登崇俊良召君試內廷尋奉使閩浙

既歸拜禮科給事中君之侍左右也半載凝峻而敷奏  
詳明於事善斷制而論說從容人皆服其能三年夏往  
蘓松諸郡廉察民隱歸則密有所奏人莫可知四年安  
南不率聲教流毒邊徼於是制太子太傅成國公能為  
大將軍新城侯輔為左右副將軍將兵討之以尚書  
雋參議軍事又選廷臣有文學才識者副之君居其首  
出入大將軍幕中自大將軍以下莫不加禮事無大小  
君悉與聞又以君剛直兼掌紀將士功過是年安南平  
俘其偽王李昇等獻之闕下遂郡縣其地君仍留措置  
繁劇勤勞居多明年夏六月得熱疾涉旬不愈給事中

勞均為候醫疾亟不能言但以手指心時時起伏若叩  
頭狀良久微聲曰賊已平我即死無憾矣言畢而逝六  
月十五日也享年三十有五聞者悲悼來為斂祭者百餘  
人尚書素善君函其骨令君家僮黑住歸之故鄉八年  
冬季思始卜葬於縣東黃嶺之原君剛義人也身長七  
尺美容儀事父母孝交朋友信蓄妻子仁其論議古今  
治道得失卓然自負人皆以大任期之至於術者觀君  
之相亦以為然孰謂君年止是而卒邪方卒時訃聞京  
師予哭曰知君者莫如予當狀而銘之此葬時予文留  
北京一夕夢君被甲伏劒若今之宿衛者具墳壙欲語

登連余銘者邪既還聞君葬且銘矣嗚呼是余未能慰  
君之死故君之靈猶感予於數千里之外也乃叙君平  
生大槩為表諸墓上以垂示後世復係之以銘曰  
有美王姓金谿儒宗翼翼高門世德攸崇隱君之子司  
門從孫頴異拔類質偉言溫讀書明理匪事章句正已  
斥邪任義之怒邾家之器瑚璉之重登于朝廷為

天子用天子在御君侍左右侃侃于于寵顧日厚

天子有命大將南征虎符龍節疊鼓鳴鉦士奮其勇君效  
謀策一鏃不遺小醜斯得凱歌載途歸于京師君胡不  
歸死而可悲咽咽遺言今猶在耳君則無愧終乃王事

亦豈不悲老父弱子黃嶺之原裹骨葬之神人我夢刻  
碑墓祠山高水深百世之思

故黃居士美墓誌銘

黃居士美世居金谿邑治北迄朝天坊曾祖 祖 父  
母孺人 氏子三子長士韶次士美也又次士慶士  
美質秀偉性坦而和厚早喪父奉母盡禮交朋友以誠  
與鄉人處不說不隨初士韶戍邊衛凡二十年士美念  
之不置歲遣人給貲裝甚厚及士韶還事之如父而士  
韶亦甚愛士美兄弟曰怡然相聚無何士慶卒與士韶  
撫其遺孤如已所生士美輕財尚氣義不與小人為朋



出入公府子年十六七時與士美俱主里正事雅與子  
相好故深知其為人忝官于朝凡二十餘年始獲歸省  
與士美會晤士美別構室於故居之側臨軒有池池多  
菱蓮游魚近水開蔬圃間植花竹軒中貯棋局樽壺時  
時與士韶對酌客至必笑歌盡興士美善飲人招之輒  
往持大盃相酬勸終日不倦怠亦不見其醉雖醉禮度  
猶肅未嘗以言語忤人士韶之德量亦如之鄉黨之人  
稱其兄弟者無間言也士美與予別又十年以疾終予聞  
而哭之前寧化知縣何伯瑾來京師致士韶之意請銘  
葬于白馬鄉流源里俯仰疇昔悲悼不已尚忍執筆為

銘哉然知士美莫如予可固辭乎逆敘而銘之士美生  
洪武年 月 日正統二年 月 日卒春秋若干  
娶張氏賢而能理其家子一人女一人銘曰  
嗚呼士美才質偉敦厥孝友循禮義善譽既乎誰毀訾  
全終其年夫何愧葬有銘文永垂世

周先生子用墓表

吉水周先生以洪武乙亥十二月卒葬其鄉之石羊磯  
故翰林學士解公銘其墓後三十年為宣德丁未先生  
之從子左春坊右諭德兼翰林侍讀崇述襄府長史孟  
簡手疏先生遺事且致先生二子綺紆之意徵文表諸

數先生諱霖字子用世為太族祖某父靜覺俱有文行  
先生性警敏絕人甫十歲從父說書公謁先壠公指所  
謂天為山者命諸子姪賦之先生詩獨先成有奇句公  
大異之先生博究六經子史而尤邃於春秋讀書一目  
數行俱下輒記憶不忘而議論辭氣英發沛然若決江  
河屢屢常屈其生人縣大夫強補為邑庠弟子負一試  
于有司弗利即慨然曰吾志素不在此歸而益肆力於  
學為文雄健有奇氣類太史公賦詩音韻鏗鏘類曹劉  
諸子先生平生所與游者若學士解公金華黃君子素  
劉君相與切嗟頡頏方其時兩人雖俱以才學名重

一時而先生又四人中之最博洽者也先生事二親孝  
親歿不御酒肉者三年兄弟五人其姪以事誦戎遠  
海君於行為幼乃獨理家政歲必遣人以給其貲撫育  
其從子凡十餘人及女弟之寡居無子者恩義兼盡焉  
君以鄉之亡賴者誣以事逮至京師既得直將歸因感  
疾卒于聚寶門之外疾亟賦詩別親舊且誦陶靖節自  
輓之詩蓋以哀其志之不遂而命之止於此也年三十  
有五娶謝氏有淑德子綺經克世其家孫男三人嗚呼  
予雖未獲拜先生以聆其論議而幸得與崇述孟簡為  
同年列官汙朝二君賢而文章格知為先生之教及

讀學士公銘序謂先生嘗自言命既徒學而無成其可  
以有成者惟吾兄之諸子乎謂述兄弟也悲夫先生有  
行誼學識惜不假之年而止於斯雖然簞瓢陋巷之  
士不得其壽而人皆稱其賢彼貴且富有馬千駟而卒  
無德可稱士所貴者亦不在其他也此余於先生有所景  
仰而慨慕焉乃論著其槩俾刻而表之隧道過者必將  
式之曰此吉水周先生之墓

大明故華處士墓表

惟華氏遠有代序居常之無錫者譜牒所載系出南齊  
孝子寶寶之後諱詮者仕為無錫主簿遂家其邑之陽

亭里處士諱審字詳叔詮之六世孫也詮子諱雷元濂  
溪書院山長有學行山長之子玠長安織染局提舉至  
處士之曾祖諱鑑祖諱淇考諱采俱有隱德而采又徙  
邑橫山之陽母孺人錢氏處士早失怙錢孺人撫育教  
訓之年十二從學于達處王先生讀經史皆通既長卓  
然自立姑蘇節婦曹氏朱仲昂之妻也有女必擇佳婿  
聞處士賢納于甥館處士雖年少而制行甚謹事曹如  
母又迎養母孺人事之之禮均而無間人稱其孝處士  
溫厚仁讓言必忠信交必益友舉動必循規度嘗為賦  
稅長徵科輸納必以其時而不擾於民逋欠者必賙卹

之永樂初有盜夜入室取財物而去處士置之不問  
自敗縣官以強劫坐之牽連二十餘人處士白於縣曰  
盜雖掠未嘗傷人死則自我死之也况盜不應死於是  
以竊盜論得免死鄉人無少長咸稱道之處士於永樂  
戊戌六月九日以疾終春秋四十有四明年二月四日  
葬邑烏龍山桃花塢朱孺人慈淑儉勤善理其家處士  
歿毀容飾居孀守節志操凜然如母時人以雙節稱之  
正統十三年正月二十一日卒壽七十有九葬處士墓  
之側子一人靖孝友謹愿克世其家娶葉氏繼王氏女  
二人孫男三人孫女二人曾孫男三人女一人嗚呼華

之居無錫者蓋二百餘禩代有聞人迄今猶盛言者謂  
其先世敦禮尚義樂善好施者厚故流澤迨於悠久蓋  
信然矣而處士之持已存心且如此宜享壽福乃嗇其  
年何耶然有靖為之子諸孫皆秀偉所以昌大豐顯者  
未艾天之報處士其亦存茲乎處士歿已三十餘年而  
靖以墓上之石未刻奉長史楊公仲舉之狀以請予文  
夫表揚親德孝子慈孫之所用心也乃序述其事行俾  
鍊石樹之墓道以垂休于世世焉

贈左僉都御史李公太恭人合葬墓誌銘

都察院左僉都御史李濬初以太學生為監察御史可



先生賢甫憂守制家居會親藩謀叛劫衆從已濬取身  
晨夜馳至京告變

朝廷亦察知其實斷以大義聲罪討平之而嘉濬之忠遂  
擢僉都憲時宣德丙午也又二年推思濬之先世贈  
賢甫中順大夫官亦僉都御史母鄭氏太恭人又六年  
太恭人卒濬聞訃號慟請於予曰先君歿葬鄉之太平  
店而未有銘今吾母歿將合葬焉敢以狀請予辭不獲  
按李氏世居山東之樂安州今為武定州士賢甫諱德  
曾祖諱克敬祖諱孝先父諱傑皆敦厚為鄉閭所稱士  
賢甫幼孤母楊孺人撫育教訓之及長讀書知太義力

本務實無所矜飾而事母盡孝道交朋友誠謹事有合  
於義者必力為之洪武初大將率兵下山東從耆老迎  
拜而鄉民避兵有蔽地害中者兵發害得二百餘人欲  
加害士賢甫力救之得免是時歲歉士賢甫有儲粟悉  
以賑其里之人人感其惠稱為長者卒年八十太恭人  
諱嫺性慈淑既為婦奉蒸嘗事舅姑相夫理其家孝敬  
勤儉至為母持身益謹而於治繭絲躬織紝教子讀書  
至老不憚勤苦生元至正庚寅三月二十日卒乙卯正  
月二十日壽八十有六諱崇諱瑜諱亨其曾祖及祖與  
父也子長詰其次濬清直謹厚克振風紀孫男六楫棠

森榮果本孫女三貞靜妙曾孫男四炳煥煒燧予觀士  
賢甫蓄德在己而相以太恭人之賢俱享高壽又有子  
孫顯揚於時寵榮褒大之命足以表於後世此天之厚  
報其德也銘曰

顯顯御史濟也寔宜都憲之陞褒之顯之維士賢甫都  
憲之父好德行義嘉譽夙著維太恭人都憲之母躬修  
懿行享有壽考褒封之命輝光赫奕曷以致茲天報其  
德武定之南崇岡逶迤有幽其宅同歸于斯伐石刻銘  
昭其休光尚告後人孝思勿忘

贈刑部主事梁公墓誌銘

贈承德郎刑部主事泰和梁公以洪武庚辰夏四月卒  
得年四十有八葬所居之南後二十六年為洪熙元年  
公始以子洞為刑部主事蒙

朝廷賜敕命又推恩於其親遂有主事之贈未幾洞陞郎  
中乞歸改葬公於邑沅溪湖頭之原而洞亦尋卒又九  
年為正統二年洞子相奉檄徵予銘公墓公諱葵字廷  
敏性穎悟讀書史通大義不喜操觚為詞章然其中抱  
負非庸俗可比嘗遊京師覽觀都邑之壯文物之盛遂  
道丹陽至姑蘓錢塘泛舟西湖渡淞而東尋子陵故釣  
臺抵金華鼓棹雙溪因訪其外兄縣丞鍾仲輔與游處

者歟之公新至賢士大夫相與為友當時名人如蘇平  
徐仲子一見契合以詩文贈之既歸充然若有所得或  
勸之仕公曰遠遊適意耳仕非吾志焉少游之言平生  
念之乃築室郭之西南溪之許有園池花木之勝日與  
賓客以觴詠為樂縣令丞素聞公制行端謹以度田均  
賦與治水二事請公董之公辭不獲躬理其事賦高下  
有等脩浚有法令丞嘉歎之公長身偉貌襟度夷曠識  
見明敏人有疑事輒咨訪焉居鄉循循雅飾不矜不肆  
敦孝友尚信義人之稱公者無間言也娶王氏有婦德  
子一人洞也女三人適胡仲器蕭季廣郭仲吾孫男四

人林相杉粉曾孫四公環珩珪公初為館甥於王已  
之田悉讓其兄未有子鞠仲兄不移先生之厚本之力  
教之學本之又以所學教洞一門之內家學相傳人以  
梁氏為盛梁之先本長沙人南唐時徵仕郎勝用始徙  
泰和族遂蕃衍公之曾祖昭伯撫州太守祖才可父心  
易先生俱以行誼稱於鄉銘曰  
有子既仕為親榮有孫繼續思刻銘公之才志夙有稱  
揭此遺德昭冥冥允矣百世垂芳馨

刑部右侍郎陳公墓碑銘

正統二年丁巳冬十二月乙酉刑部右侍郎陳公以疾

卒于位

上為之悼惜賜祭命有司給官舟歸其喪且為塋葬公同鄉之士監察御史王子倫請於予曰陳公官三品有學行政事墓宜立碑銘以狀屬執事予辭不獲迺按牘序次而銘之公諱鼎字重器居廣東肇慶府新興縣世為名族曾祖某力本務學祖可文父以平俱有隱德以公貴俱贈嘉議大夫都察院右副都御史祖妣蘇氏妣柯氏俱贈淑人公性端敏蚤失怙篤志於學年十二三即通四書大義鄉先輩奇之及冠為學益勤博聞強記知名郡中補邑庠弟子負異領鄉舉登永樂乙未進士授

荆江道監察御史改廣西道立朝正色持法無私彈劾  
不避權勢按巡外郡鉏剔貪暴撫循罷弱平反冤獄所  
至人皆畏服

宣宗皇帝在御以郡守之任民之休戚所係命公卿大臣  
舉朝臣之廉正者任之而公居其首拜江西建昌府知  
府賜璽書獎勵俾馳傳而往公至郡宣

上德意詢察民隱革其宿弊政治一新獨護衛官校恃威  
強橫暴如虎狼公揭榜禁戒之不悛已而有群行市井  
掠財傷人者公悉禽捕正之以法由是強橫者斂跡民  
大慰悅用薦召還京拜右副都御史守正不阿風裁益



振捕蝗河間諸郡役民有節而加以撫勞來人不知勞  
蝗不為灾改刑部侍郎明慎刑罰獄無冤滯僚屬咸敬  
之公外和内剛言語謙簡而臨事果斷善薦引賢士以  
廉自持服食儉約初在建昌改造府治發地得金銀器  
玩諸物悉進于朝其從父自廣來視之入廨舍視其四  
壁蕭然喜而歎曰吾家本儒素汝能淡泊如此可無媿  
矣事親孝交朋友信義馭下有恩威而不事苛細既得  
疾上命國醫治療卒年四十有八葬其鄉之某山娶鄧  
氏加封至淑人子早夭遺命以從兄之子某為嗣女三  
人未嫁嗚呼公以進士陞至列卿之亞而聲望卓然備

任方隆惜其年未及中壽而止然士之學而仕仕而至  
通顯有治行可書雖死何憾其公之謂歟宜刻碑于墓  
銘曰

陳君新興有著其嗣公紹厥家稽經讀史既登巍科持  
斧衣繡暨守大邦金章紫綬再陟臺端旋副秋卿允公  
所至赫赫有聲惟明惟寬弘大其惠惟廉惟正政務以  
理卓哉賢臣允矣君子胡不永年而止於此靈車遲遲  
返于故鄉山高水環永固其藏伐石刻銘紀公之德嗚  
呼後人過者必式

故通議大夫工部右侍郎羅公墓碑銘

太宗皇帝以聖神文武之德入正統制作禮樂脩明典  
章興舉政事尤夙夜孜孜廣求賢才以圖治理歲甲申  
廷策進士得四百七十一人取士於斯為盛而選入翰  
林續學以俟擢用者得二十八人當時以為遴選之至  
與其選者吉水羅公尤卓然有所抱負者也公諱肅字  
汝敬性穎悟方七八齡賦詩輒有奇句稍長受經於仲  
兄汝弘窮探博究旁及百氏之書學以大進補廬陵邑  
庠生遂舉于鄉第進士與選人詞垣是時嘉祥疊見朝  
臣多賦詩頌公所作長篇短章詞氣浩然超出同輩擢  
翰林脩撰扈從車駕巡守北京所經山川風俗多有歌

咏九載陞侍講脩高廟實錄賜襲衣寶楮

仁宗皇帝臨御天下公言時政十五事降雲南道監察御史且令掌道蓋公所言過直故降官然亦以其敢言有學識使歷風憲可大用也公執法持正理冤獄多平反者

宣考嗣位交趾黎利弗靖咸山侯王通等用兵無功陞公工部右侍郎與李琦等齎璽書諭利未至而通與利和自率衆出境矣衆止公勿往公曰王師敗辱國我受命諭賊可退縮不進乎賊雖凶暴必不敢拒詔與琦並馳至其國宣上恩意利惶愧率其屬拜自蒲其過遣使獻

金冬奉表詣闕稱謝並請葬陳氏之孫肅復命公往立  
之既至利以肅已死所張筵列女樂設宴公既曰肅死  
爾國人安可淫樂盡擊破其尊壘樂器時天晴忽陰雲  
起大雨雷震焚利居室利懼貢方物表謝還朝督兩浙  
漕運奏減荒田稅糧陝西言邊地腴田為權豪占奪致  
糧儲不克士有饑者命公往理之公劾守將之貪暴者  
取田為權豪所占者經度頃畝均與細民倍加邊儲充  
足增置倉庾立執運之法省民勞役又奏置河渠提舉  
官專掌水利而邊臣不得為姦利者輒加誣謗公還朝  
言之詔勿問命公復往

今聖天子即位之元年西虜有寇邊者遣將追捕公督糧  
餉至紅子城之地忽遇虜飛矢如雨中公左膊墜馬虜  
環聚以鋒鏑加其身欲害之一老酋與衆疑語良久乃  
舍之而從行吏卒皆被害方公遂遇虜也運餉者遙匿  
草澤中見衣緋者數人在公左右若衛掖之狀公無  
恙咸以為神助云公在陝久有言其多疾者召還賜致  
仕及賜鈔給驛舟還鄉時正統三年五月也後一年十  
月二十五日終享年六十有八訃聞上遣官賜祭葬里  
之竹園陂山考養蒙先生墓之左也公質脩偉多髯剛  
果善裁制繁劇與人論議或異已輒叱咤而其中坦蕩

不廢宿憾事親孝謹處宗弟和教子姪嚴交朋友以義  
為詩歌文章下筆如長江大河滔滔不絕遺稿悉藏于  
家羅之先居錢塘中葉諱軒者為州刺史因家郡城之  
邱岡再世徙吉水之龜林宋寶祐間諱某與其子某同  
登進士所著有鶴林玉露傳於世至公之曾祖諱某祖  
諱時中俱有學行時中贈工部侍郎父諱養蒙號耕樂  
翁工於詩詞累贈通議大夫工部侍郎妣李氏與祖妣  
蕭氏俱贈淑人公娶李氏蕭氏子五人數先卒次敬敏  
致孫男八人曾孫男三人曾孫女二人公致政而歸也  
杜門不出以吟咏為樂而鄉人以公佚多蓄積嗇於

散金及沒棺歛之外囊篋枵然皆歎其操守不可及也  
公之諸孤既奉狀以墓碑為請而從子孝感縣令勉學  
來京師泣而言曰先叔教養諸姪其恩不敢忘刻碑當  
竭力其請益至予與公同年同選入翰林同官于朝相  
知最深誼不敢辭銘曰

於皇

太宗聖德隆崇儒用賢昭治功詞苑濟濟來群龍公志卓  
越先奮庸擢職太史文最正播厥歌頌聲泯泯一封諫  
疏達九重要簪笏角馳青駟臺端凜凜生威風司空戴  
卿品秩崇持節遠歷銅柱東蠻苗稽顙俱服從經理西



陟勞厥躬田疇均一與飢充中邁醜虜如聚蜂神底公  
不羅其鋒歸休林壑巢雲松安榮佚樂以令終竹園山  
高馬鬣封嶼岩千仞石可礪刻銘昭德垂無窮

故怡澹先生墓表

海陽潮之屬邑也潮為東廣名郡海山之區民力耕稼  
士篤於文行昔稱為海濱鄒魯之邦讀書登科甲而仕  
者聲望相繼隱而韜光晦跡者行誼可稱迄今豈無其  
人若怡澹先生是已先生世居海陽姓吳氏諱平字彥  
衡別號怡澹鄉之士稱為怡澹先生曾祖諱國泰祖諱  
父諱俱以儒知名先生年十三而孤性端敏嗜學

不倦及長痛父蚤弃養恒切悲慕而事母宜人許氏旦  
夕必衣冠問起居出入必告侍側必婉其容色奉甘旨  
必致豐潔甚得母之歡心母歿哀慟幾絕葬祭一遵文  
公家禮鄉黨稱先生之孝先生循循然言不妄發而動  
止以禮則交友以信待人以誠教子以勤學欲其立身  
揚名以光大厥家平生寡嗜慾見人之驕傲物之華靡  
深惡之以澹素儉薄為樂故自號曰怡澹云生 年

月 日永樂戊戌七月八日終于疾春秋四十有八以  
終之明年十二月庚申葬邑秋溪官山之陽娶陳氏有  
婦德子五人長瓊永樂辛丑進士擢刑部主事兩遷至

黎平府知府次璋瑛璉珙女一人適劉觀孫男二人鳳  
儀鳳翔鳴呼潮多賢士有隱德者若先生豈多得哉惜  
予未獲與游而璉自生事出判撫郡予故鄉也知其賢  
及守黎平實予所舉璉有能有所至有惠政民歌頌  
之非先生教之有成也歟先生之德行蓋如此歿已二  
十餘年璉乃手疏其事泣而言曰仰承先人休光至于  
今日而墓石未立罪莫大焉敢以表墓之文為請璉宦  
游南北馳驅不暇而不忘乎此蓋篤於孝思者也乃不  
辭為叙次其實俾刻石墓之上過者必式曰此怡澹先  
生之墓

封刑部主事何君墓誌銘

嗚呼古之稱謹厚君子者今豈多見哉而予於何君重  
炳有取焉君居金谿之后車里自幼至長循循然躬行  
孝友敦尚朴素不嗜榮利於世之是非得失舉無所較  
焉家故多貲產因徭役之繁吏肆貪刻豪橫者並緣為  
姦欲侵奪其產君輒與之或辱以非禮之言亦受之有  
竊笑君者君太笑曰欺我者自欺辱我者自辱天豈欺  
辱我哉未幾其人皆顛踣二從弟幼孤力加訓育而待  
姻族以仁交朋友以信撫僕隸童稚以恩從容和樂與  
物無忤嘗別構屋前俯大溪左右植花竹中真琴書日

燕游其間或焚香操琴或臨流歌詩以適其興因自號  
為綠水翁謂水清無心可以比已心也教子勤篤自學  
遂以明經登第為刑部主事奏分俸之半給於鄉為養  
君時時置酒與宗族鄉人劇飲曰此

朝廷所賜當共享之既又受勅命封承直郎官亦刑部主  
事自學又得請歸省鄉人榮其父子而君之心亦淡然  
不以介意惟戒勸自學以忠勤君職平生喜讀書吏及  
醫卜陰陽之說亦皆通究善為五七言詩成輒削稿蓋  
不欲有名於時也嗚呼君之操履如此非所謂謹厚君  
子者歟生丁未十一月九日正統辛酉六月忽微疾語

族人諸子孫曰吾殆不起矣遂作律詩三章以示訣別  
書畢而逝神識不亂是月十三日也壽九十有五娶曾  
氏德儀兼備子二長自學以主事陞廣西按察僉事次  
斗女一適朱經孫男三蟾勲恩孫女一適徐的曾孫男  
一洪自學聞訃自廣西奔喪還鄉以 年月日葬于某  
山之原奉挾遣人走京師請銘何之先君光澤五季時  
周尚書左僕射瑀之子輝為屯田員外郎周日罷歸道  
經金谿遂家于后車衣冠文物久而愈盛曰聖曰達曰  
遠曰宗哲俱有士行君之曾祖祖父也銘曰  
古先德人蓄其德厥中醇和外不飾君於古道能允迪

壽九十五迄玄宅銘昭其休永無斁

故昭勇將軍上輕車都尉山東都指揮僉事趙公  
墓碑銘

天啓國家

太祖高皇帝龍興淮甸豪傑英偉之士相從立功効勞以  
成大業者既享有富貴而祿位必及其後嗣焉傳數世  
數人能丕墜其前人之志者可謂賢子孫也予於趙氏  
見之趙居鳳陽曰仁惇謹尚信義曰德勝剛果有才畧  
曰端勇而善騎射從

太宗渡江俱力戰有功至顯官仁累贈天水郡侯德勝開

國輔運推誠宣力武臣特進榮祿大夫樞密副都知大都  
督府事贈梁國公謚武桓端廣威將軍上騎都尉金鄉  
化衛指揮事加鎮國將軍上護軍廣東都指揮同知曰  
麟端之子也嗣父職曰斌天策衛指揮使曰故金吾衛  
指揮同知曰全清浪衛指揮同知一門之內腰金衣緋  
貴盛莫比麟之子本邳州衛指揮使以薦陞山東都指  
揮僉事公字宗立本其諱也性謹厚嗜學讀經史輟畧  
諸書以父登棄讓恒切悲慕而事母以孝處兄弟待宗  
族以義守邳善撫士卒嘗率衆造海舟運營建材木使  
下有節人樂趨事兩扈從北征沙漠以功獲厚賞及典



兵方嶽撫馭得宜藏撫所部士校至京師訓練申號令  
以肅部伍示恩信以收衆心甲子春從太軍捕虜邊境  
有俘獲之功凱還受賜賚公有功未嘗自矜益謙慎小  
心循循若儒者人之稱者無間言也正統丙寅春正月  
忽邁疾還山東疾轉加劇語諸子曰吾料不可起矣爾  
曹當念祖父世為武將受國恩深厚長者嗣職必竭忠  
圖報幼者必讀書取科第成名無忝前人語畢而逝得  
年五十有四娶沈氏封淑人賢淑之德閭閻取則子二  
人長輔俊偉有才能次弼習進士業女四次鄧州衛指揮  
車銘單鏞其壻也次許嫁山東按察副使汪昌問之

子懋又次尚幼孫男一人咬佳公卒山東兵民咸哀之  
交游之士相與哭弔者道路相望以卒之年六月六日  
葬鳳陽先塋之次輔以試武藝優等襲濟寧左衛指揮  
使奉狀請銘刻石墓道懋予之孫也與公有姻好銘不  
可辭銘曰

天眷

皇明於赫 聖祖仗劍而興混一寰宇熊羆之士奮身相  
從趙氏諸將既勇且雄德勝之忠端武之勇麟之才智  
其名益重維公桓桓乃麟之子克紹先志官至衛使進  
守大藩以典兵政亦有戰功多受寵命公不自滿恭勤  
愈加宜奮而踣孰不興嗟鳳陽之山玄室斯闕刻銘昭

德垂耀百世

敦處士徐習堯墓誌銘

徐經字習堯居金谿邑南三十里之善山世以貴雄而族甚蕃鄉人遂名其所居之地曰徐源習堯之祖諱仲芳父諱思忠俱循理樂善州里稱之母江氏習堯性敦謹克承家訓讀書通大義事父母友兄弟交朋友以敬以讓以信無市邑澆薄之習父嘗患目疾昏翳痛楚醫視之曰盲不可治矣習堯焚香禱於神得吉卜走他鄉得醫治之目復明奉養益盡誠孝父母歿哀毀踰制宗族和歲時必燕會以叙親愛且訓以孝弟仁義之言處

鄉黨於人無所爭貧乏者或推所有以惠之家故有書  
畫曰此先世所藏也子孫當寶之賓客至則與之披閱  
已乃圍棋酌酒不盡歡不止間抵城市布衣草履軟屨  
如古之隱人自少至長始終如是也忽得疾語三子曰  
吾料不可起矣爾兄弟當躬行孝友力本務學以振家  
聲語畢而終正統戊午三月十九日也享年六十有六  
娶喻氏甚賢能子一儒女一適縣郭詹景寧繼王氏贈  
禮部左侍郎兼翰林學士脩本之女勤儉備婦德子一  
翰孫男五敬或恭陵寬孫女二幼未嫁翰奉前監察御  
史江公之狀來請銘葬于本里之丁塘習堯子女弟之

夫也以其謹厚甚愛之其亡也聞訃哭之哀銘不可辭  
銘曰  
徐族之蕃聞望累世貿貿習堯志不射利善著于鄉終  
亦何愧崇崇茲丘玄室斯闕刻銘昭德示爾來裔

故處士周伯義墓表

金谿周庸字伯義以正統四年三月初一日終其生之  
年在元至正丁酉十月十六日享春秋八十有三葬縣  
東白馬鄉之蔗埠既有誌以納諸幽而其孤忠奉監察  
御史江君克恭之狀遣人走京師請文表其墓伯義與  
予同邑里也予家食時識之為人頴敏早失怙恃值元

季兵戈騷動人不寧君伯義避亂于外

聖朝平定四海伯義年且長為贅婿於陳氏陳居縣東水門久之伯義別創屋而居力本治生經營其家惟恐不能自振歷齊魯燕冀關洛閩廣以懋遷為業歲久充然其貲而家以富饒矣暮年以家務付諸子而時且承平享有高年優游無事惟篤教子孫務學他無所營也既卒人皆哀之配陳氏有婦德子男三人長冕次忠為上莊驛驛丞又次盤女二人適李凱支同孫男九人孫女八人周之先有諱大廈者唐寶歷中為撫州刺史因家于撫宋祥符間有諱簡者徙金谿之澳塘簡之子清累

官至福建行省叅政清子楷明經有文行楷之子雅富而好禮雅有子曰公能慷慨尚義自澳塘而居十餘世白藹曰崇二曰良十二公者伯義之曾祖祖與父也俱好德而隱毋馮氏伯義實出名族代多顯人今雖未有顯者而伯義能勤儉自樹立以成其家且有子孫之多足以光前而裕後也故按牀叙次其實用表諸墓云故處士魯公敬中墓表

南城魯處士敬中既卒葬于山溪之其孤構奉嘉興州同知姚文通之狀來徵文表諸墓按牀魯氏實邨國宗聖公之裔家故有譜牒相傳至唐金紫光祿大夫校檢

司空諱洪立居臨川司空之子右散騎常侍延鐸徙南  
豐傳四世至文定文肅文昭公以文章政事大顯于時  
文定之三世孫曦始徙南城其里曰高富曦之後族以  
蕃盛稱為大族諱璧判南豐州者公之祖也諱元仁公  
之父也公諱肅幼而安重長而岐嶷不妄言笑為阿悅  
交朋友接下以禮元季故廬燬于兵及天下平定公奮  
然曰先業既廢子孫之責安可苟且不興復乃極力經  
營悉其舊而資產益增鄉閭皆曰曹氏有子矣公置廩  
庾歲廣儲粟菽而自用甚儉遇荒歉悉以資饑者高富  
地接閩人苦瘴癘無醫藥公為屋貯百藥有疾者與之



其地有三口佛塔二山通閭要道行旅遇風雨無所止  
息公作二亭以待之里有溪涉者病焉公為舟以濟其  
往來族有孤女則撫育而嫁必選于名族凡公之樂善  
好施皆類此鄉之人無少長稱公為長者相與名所居  
曰忠厚之堂公之心益休休焉至老而行誼篤也生元  
乙未正月二十九日永樂壬寅九月十三日以疾卒疾  
革時語諸子曰吾歿可無憾惟先世祠堂未復其舊汝  
曹承謹吾志公娶懋氏慈淑有德子五人構慶教隨與  
好學有才識女二人金谿王福慶貴溪璩清其婿也孫  
男十三人孫女九人曾氏累世詩書之澤至公尤克自

舊雖未獲於用然利惠之及於人者甚博致子孫衆多  
家以殷盛亦足大其世德公雖歿誠所謂無憾者矣予  
故叙次其實<sup>刻</sup>俾諸墓石而表曰處士魯公之墓過者式  
焉



王文公文集卷之六

男祐編集

雜著

書黃節婦傳後

英讀蘇太史傳黃劉夫人事竊歎夫人之節行非近世  
女婦所可及者夫人歸黃氏事舅姑最孝而無子為夫  
聘其娣生子通五日而所生母卒年十二而孤忽得疾  
久不愈夫人慮其終不可瘳亟為娶婦生子性而通果  
卒焉通有義兄利其貲產性之生殊快快嘗持刃入室  
害之夫人大呼奮身扞蔽乃免卒保持性至成人嗚呼  
黃氏宗祀不絕而復振者實夫人之力也何其賢哉世

之士居高位食祿受託孤之寄至於臨危難能身任安  
危不計禍福者此大丈夫未也然亦未有能若此者矣觀  
夫人守節不回撫其二世遺孤以身冒白刃却凶暴其  
節行如此亦豈不如大丈夫哉陳寡婦之孝房玄齡夫  
人之貞信柳仲郢母之善教子鄭義崇之妻冒刃救姑  
載之傳記稱其節義夫人視此可以無愧矣太史傳之  
以垂休于後世不亦宜乎今夫人之曾孫介庵公官至  
少保戶部尚書兼武英殿大學士祇事

四朝寵遇彌厚三世皆受褒贈而子孫衆多黃氏方盛而  
未艾此非天之所以報夫人也歟英公之生也公桓與

英語及夫人事輒悲慕流涕英讀是傳有所感嘆惜為  
題其後云

跋胡尚書輯錄醫方後

右衛生易簡方若干卷禮部尚書毘陵胡公之所輯也  
公為侍郎時奉使命于四方觀風問俗之餘博采古今  
今醫方其可徵驗者分類而編輯之曰衛生易簡方表  
進于廷

太宗文皇帝嘉之已而公又綴梓傳之以廣其惠利嗚呼  
公之心何其厚哉士之用於世志於致君澤民也故凡  
事有可利於人者必為之豈非仁人君子哉若公之輯

此方以示人者是已觀此則知公之為臣其謀謨密勿  
有裨於治而惠及於人者必尤多也昔宋侍中陳堯叟  
錄集驗方百卷為廣南西路轉運時聞俗疾病不服藥  
多夭橫者堯叟以方刻石于桂州驛舍全按方求藥人  
遵其教病者多愈夫堯叟宋名臣也有學行政事而又  
能濟人如此非所謂人仁君子耶公之名位與其存心  
夫豈減於堯叟乎不可不為公道其美也間以此示英  
故題其後

恭題御書後

仁宗皇帝在東宮時親洒宸翰賜翰林脩撰臣直蓋以白

金藥物賜之并許真之父瓊知府致仕凡五十一字端  
重如山嶽勁利如劍戟光華如日星潤澤如雨露非世  
人之書所可比擬也既續承大統陞臣直為右庶子兼  
侍讀學士待儒者之恩至矣厚矣臣直仰承恩德不敢  
頃刻有忘竇此書惟謹而屬臣英識其後嗚呼宸晝天  
藻炳然煥然若河圖大訓弘璧琬琰之在目而龍馭則  
在天矣悲夫豈特臣直有無窮之思哉

書讌集團後

太宗皇帝御天下勵精治理登崇賢能而於二十八人者  
加恩甚優而期待甚至者也當時以為榮遇及今幾三



十年而存者半有八人然皆有名位非蒙恩深厚之所至耶英忝與其列夙夜慚慄無能報稱仰思大德敢志所自哉効犬馬之誠竭其餘力正在於今日也因書此圖之末與同志者勉之

郭弘郭毅字說

古者子生而命之以名及冠則父兄師友字之者以成人之通待之也夫字者所以表著其德因是而加勉焉夫豈徒為美稱也哉然世之人則不然名與字非但無所取義或至於誇大或過於僭踰者有之惟君子則慎重於此也秋官主事郭君鼎貞以政績居最超拜郎中

來謁於子曰吾之孫曰弘曰毅而弘字之曰庸寬毅字  
之曰庸剛先生幸申其義以勗之嗚呼鼎貞誠所謂君  
子哉待其孫以成人之道亦至矣予焉得無言乎乃告  
于弘曰弘之義克也大也人惟克其大量斯能容物弘  
乎尚慮爾惑於儉邪近於濇狹爾祖乃期之曰宜庸於  
寬寬則其中廓然有容而德乃大矣又告于毅曰毅之  
理決也勇敢也人惟果敢而有立則有為有守矣毅乎  
尚慮爾溺於物欲則易至柔懦爾祖期之曰宜庸於剛  
剛則無欲不屈不撓而德可成矣雖然書之言九德又  
曰寬而栗剛而塞夫寬弘加以莊栗剛健加以篤

實斯所以為成德之士可以俸乎公卿大夫弘乎毅乎  
尚以此加勉予見其學成行脩必致身通顯大有所造  
就矣非所謂因寧以著其德者耶郭故仕宦名族代有  
聞人爾祖居官尤清慎和樂所以繼美乎先世蹈迪乎  
祖德者弘與毅當益思以自勉也故書是說以歸之

跋燕會詩文後

右除夕分韻詩凡八首泰和諸君子燕會之作也泰和  
多賢才列官于朝今危徙留北京而贊善梁先生年最  
長為鄉先輩當歲除之夕置酒高會觴酌酬勸迭起為  
壽先生曰酒以合歡而樂必有節所以暢其情而發舒

其志意者非詠歌不可於是分韻各賦一詩而屬在坐  
脩撰王君為之序焉嗚呼古者以酒食召鄉黨僚友其  
禮意兼盡觀周詩伐木之章醴酒陳饋秩其邊豆以宴  
飲為樂者無他焉睦親親而序朋友以篤其恩愛耳後  
世此意不存嬉遊宴聚歌呼喧呶至於沉酣無度者彼  
安足以語此今先生獨能因歲時之會敦叙鄉黨故舊  
宴以成禮而情以孚洽誠有古人之遺風也歟故凡作  
詩者之意皆尊德尚齒以敬戒勸勉為辭此豈特見諸  
君子契誼之厚其所以昭

國家之盛如成周之時者又豈不在茲乎予辱知於先生

且久以此詩示予為之捧誦歎羨不已故為題其後俾傳之鄉邑播之四方讀者又宜無所慨慕哉

書四明袁氏族譜後

予始托交於袁君忠徹因得謁其先夫夫柳莊先生於北京城南之私第先生方晨起具衣冠拜家廟威儀肅然已乃延客坐子弟列侍庭下先生氣清而色夷言辭侃侃一見之頃懽如平生有德之君子固如此先生既沒後五年忠徹以其家譜示予乃先生所脩輯者自得姓之始至漢唐而下支分派別粲然明盛而居四明者則始於刑部侍郎子誠由南昌而徙焉自侍郎而下多

為名宦先生官至太常寺丞致仕忠徹由尚寶司丞今  
為中書舍人俱以清望著聞當世嗚呼何袁氏之多賢  
如是耶蓋其世有積德而先生之醇和雅直又如此則  
流澤之遠又豈止於斯邪乃為之慨歎以先生不可復  
見矣而獨有茲譜以傳之賢子孫遂書以識之

書袁鏞死節傳後

予讀天台林右所撰宋進士袁鏞死節傳因嘆曰昔謝  
枋得既登進士不合於賈似道遂黜之家居教授景炎  
既立起為江東制置枋得募兵救國難力戰不勝遂磔  
姓名匿建寧山中已而有招之仕元者竟不食而死鏞

亦咸淳進士。父憂居家。德祐二年元兵至鄞。鏞與知  
四明府趙孟傳將作少監謝昌元謀以兵禦之。鏞先往  
覘敵。為所擒。投烈火中。罵不絕口而死。孟傳等竟歸元。  
而仕焉。嗚呼。鏞未嘗授一命之托。然其心之忠。類枋得  
而其死之烈。殆又過之歟。夫宋自景定以來。賈似道當  
國。嫉忌正人。如李芾、文天祥、江公望皆被其斥棄。况其  
他乎。鏞蓋慷慨忠義人也。使其時得立於朝。亦必昌言  
正論。似道寧不以事中傷之。幸不遭此。而卒能以身死  
敵。其名炳然。可以追蹤李芾諸公之後矣。鏞何憾哉。獨  
惜其事為奸邪所斥。不載宋史。使人傳誦如枋得之彰。

著然士大夫之立身大節求其無愧於心而已無愧於心則無愧於天地鬼神而世之公論必有在焉故鏞之事今乃顯白于世又豈不可以垂休於萬世哉彼偷生竊祿苟安於一時者曾大彘不若君子蓋耻言之觀是傳者其不慨歎也夫鏞之後五世孫忠徹今列官侍從求予題其後故書以歸之

書方尚書所藏朱夫子墨蹟

常讀文公先生書字銘曰握管濡毫伸紙行墨一在其中點點畫畫又曰放意則荒取妍則惑必有事焉神明厥德夫書六藝之一也學者之餘事而有至理寓焉去



古既遠世之學書者以姿媚妍麗為工而所書者則又多艷辭俚語無益於世是以先生之所謂一者敬也敬存於心則不至於荒惑而書之體自得有事於此乃能神明其德先生於書其敬且爾在他人可不慎哉今觀兵部尚書方公所藏夙興夜寐四大字乃先生之所書也不特字畫臻其神妙而其辭乃經傳格言士之所當佩服而行之者則知先生不輕於書而書則未嘗及無益之辭其敬之益至何如哉惟公以弘博之才位列六卿既貴且顯矣然而不玩他物獨於此書寶愛若拱璧然展玩恒不釋手故能忠勤惕勵以事于上卓然為時

名臣非有得於先生敬之一字者歟然則先生是書足以興起感發於人如此亦豈但公之所當寶也學者皆當寶之也僭敢書此于後

靜庵先生傳

黃先生諱性字思恭別號靜庵世居溫之永嘉八世祖衮宋御史檢法衮四世孫適道生元衡州路明正書院山長南一南一生松陽縣學教諭應發應發生通先生父也先生性端敏幼失怙祖母劉夫人篤教之由是力學有譽於州邑鄉黨元末方國珍據溫專制一方以利祿誘致士大夫趨附者輻輳有招先生從之者先生曰

察其人觀其設施賢者必不屑就吾寧抱膝長吟高臥  
吾廬耳乃奉親遁山谷間躬自耕鑿以供甘旨國珍亡  
附之者漸獨先生無恙

天朝四方底定先生還故廬理田園舊業尤不廢詩書與  
人言必孝弟忠信有暴橫者侵奪先生蔬圃不與較而  
讓之曰彼得圃亦若吾有也閩人陳興祖客死于溫先  
生善其人為具棺斂葬之內弟太學生王時中督公務  
自山西還京致書求禦寒衣先生以其能廉即解衣遺  
之無何時中以事獲罪當沒其家先生坐同籍被累蓋  
時<sub>中</sub>幼孤附籍于黃也至京得直而歸先生深隱約惟力

善敦德子少保公淮登洪武丁丑進士起家中書舍人  
累陟華要位至孤鄉洪熙改元之初推恩其先世而先  
生封榮祿大夫少保戶部尚書兼武英殿大學士既而  
少保以疾辭位還鄉父子官俱一品錦衣玉帶嬉遊田  
里人人爲榮之先生恬淡寡嗜欲惟好古書史名畫翰  
墨善吟咏有靜庵稿八卷年九十有三終 贊曰先

生之操履善矣有子孫之賢享壽福之隆人皆謂宜而  
不知先生所難者當叔世獨不污合苟遇以取富貴乃  
潔然遠引以全其身殆有所見而然歟人有恒言知者  
能遠害仁者必獲福諒哉斯言彼貪榮嗜利快意於一

時者亦烏足以語此

九華樵者傳

樵者不詳其姓氏一日謁予囊書數卷衣冠偉然步趨  
進退雍肅有禮度問之則曰九<sup>華</sup>樵者慕熊皎之隱逸者  
也予笑曰樵者果若是乎居深山巖谷負薪而行荷擔  
而歌則謂之樵有力於此者有隱而樂此者有托樵之  
名以自號者有貧賤不得已而樵者今樵者褒衣魏冠  
囊書自隨日遨遊於都市而稱之曰樵果何似耶樵者  
曰嗟夫富貴名利人之所欲也然得之有命不可以強  
求彼或強求而得者必不克終則曷若守分安命之為

樂哉吾知此故甘心於樵幸今天下承平一觀光上國  
見公卿貴人敢不具時服盡禮還山則簑衣箬笠荷擔  
負薪以為樂矣且吾聞之古之樂道者隱而不仕則托  
耕稼樵漁以終其身若龐德公嚴子陵熊皎之為人吾  
恒慕之故樂於樵以自號者志在於隱趣非托名與貧  
賤之所為者夫何疑焉予聞其言而喜之將進而問其  
姓名乃束書拂衣而去繼詢之都人謂樵者姓熊名弘  
毅讀書善談星曆為熊皎之裔云

竹軒劉先生傳

先生姓劉氏諱享字嘉會號竹軒其先居安城之密湖

宋豫州刺史斌徙廬陵石塘里斌曾孫江寧司戶將又  
自石塘徙其邑銅溪高祖哲甫知汀州曾祖景春元海  
南鹽場司丞祖貴翁父岳山先生端敏勤學泰和陳心  
吾劉允中時稱名儒先生從之遊通詩書二經博究諸  
史百氏之書洪武壬戌以賢人君子徵力辭親老後舉  
經明行脩陳古今政治之要

太祖皇帝嘉之命進講

華蓋殿以言事忤執政者出為壽州學訓導戊寅冬上  
疏言六卿秩當與五軍都督相埒國子祭酒秩不當在  
太僕鄉下又言將臣子弟生長富貴習為驕侈他日安

可授官宜立武學教訓使知禮義以變其習俗陞常州  
武進縣丞為政廉勤脩學校勤課諸生讀書表其民之  
有節義者毀淫祠禁絕妖妄作善教坊再思亭以勉已  
勵俗百里之內弦歌相聞三年書最佚曹

上褒以璽書壬午縣民李德懋等作亂先生白郡守毋令  
滋蔓率衆擒首惡而諭降其黨方是時

太宗皇帝初嗣大統遣使勞以金幣先生之名由是揚於  
遠邇無何以事罷還鄉里有薦者先生輒辭宣德中監  
察御史尹崇高力薦先生雖老猶可為學校師表至京  
以年將八十辭



宣宗皇帝曰伏生九十尚傳經八十豈不可為教官先生  
辭益力上曰老者安之孔子之言也朕允其請令歸故  
鄉先生歸怡然自得居則深衣幅巾列圖史左右吟咏  
不輟而動必蹈於禮於事有合義者必見諸行族弟夢  
華三喪不能舉先生為治葬又以近舍山數十畝為鄉  
里貧者葬人名之曰義山歲旱先生禱輒雨所居多種  
竹學者稱之曰竹軒先生卒年八十二所著有竹軒集  
馮心集隨寓錄子習之舉懷才抱德為廣東按察司照  
磨孫同履諏經綸綱同登己未進士第授浙江義烏縣  
知縣論曰自昔名人仕而功業顯著者多載史傳而唐

之王友貞孟詵白履忠諸人者以才學入仕未至大顯  
既罷去則隱而終身焉豈有功業可稱哉而史亦傳之  
蓋以其志恬退不貪名嗜利祿耳若先生之學行用之  
固可有為中乃不偶雖屢薦再起而仕非所願視有貞  
輩夫何遠哉君子之論人必有取於斯故著之為傳云

### 小瀛州賦

小瀛州者抑庵王公燕休之所也公之居第在禁城東  
中作小軒四壁圖瀛州方壺皆在大海中神仙所居此  
渺茫不可窮極者也公位至少宗伯兼職代言以德望  
之隆居清密之地燕游之居以瀛州名之何耶蓋以此

適其蕭洒出塵之懷耳豈真好神仙為方外之遊哉與  
公游憇其間以舒素懷而自慰者甚余之所欲也乃賦  
以詒之

屹禁城之層層峙岩峩之飛閣闢重門而輝煌通遠迤  
之遠郭轉東隅而地幽敞軒居之弘廓䟽八窓而玲瓏  
飾四壁以丹青奪造化之工巧圍大海於沙漠湧萬派  
之洪濤聳三山于碧落飛縹緲之雲霞舞翩翩之鸞鶴  
蔚瑤草之競秀粲影木之千萼儼瀛州之風景離塵寰  
之污濁翳鑿坡之仙人倚脩篁而婵約冠進賢之我我  
垂紫綬之若若捧日華於霄漢承雨露之霑渥適休暇

於嘉時遂暢懷而磐礴撫琴韻之清冷敲棋聲而剝啄  
既投壺以為娛優引觴而繼酌延皓月於九霄來清風  
於萬壑嗟溟渤之無際望蓬瀛其悠邈夫何秦漢之方  
士謂可採不死之靈藥泛樓舫其安之徒委命於蛟鯢  
赫晉陽之龍興展文武之籌略開天策之將府萃群英  
之卓犖如風生而雲湧觀龍騰而虎躍信當時謂之登  
瀛其聲名重於山嶽蹇余才之凡庸幸風雲之依託時  
既遇而年馳步稍進而返却尺蠖自知其莫伸冥鴻遠  
避於矰繳願相從而假息惟守道而全璞游吾心於太  
虛等萬物而同樂顧瀛州其何如謾撫掌而大噱

獅子賦有序

永樂亦有三年秋九月丙申西域以獅子來獻

陛下嘉念遠人萬里入貢詔勿卻賜百僚觀之臣考諸往牒謂聖人德通幽遠則獅子馴服今其至也實昭彰聖德有非偶然雖陛下不寶遠物然臣職詞翰當頌美其事謹百拜稽首而獻賦曰

觀哉西極之遠金城玉關之宛之外于闐月支星列于諸國廣乎幾千萬里乃有神獸名曰獅子出于其地洪河水流崇山鐵峙白草黃榆莽不可際霧涌雲蒸風激沙礪洲淪頃洞巖窟陰邃太皞神降金火精華蘊焉

胚胎生此靈異雄姿逸態超奮凌厲勁鬣毵毵脩尾如  
綫戟牙森張藏蓄鋒銳鈎爪盤挐如刀之利目光搖動  
星轉電起聲震若怒首領如喜倏忽奔駭軒軒其勢氣  
吞虎狼力倍象兕壯矣哉網羅不可得羈勒不可繫烏獲  
之勇不能搏六丁之神不能制然而豚魚之微可孚以  
信金石之堅可貫以誠孰謂茲獸化不可馴維我

皇上神武聖文巍巍乎赫赫乎立中樞建大勲撫有道伐  
不臣故德昭于天威行若神達乎遠邈格于幽冥有若  
茲獸今乃在庭絡以百寶被以珠纓曳以絳毬揚以金  
鈴迴旋低昂若朴而順悍性不驚猛氣不吐聲不震撼

目不暇顧斯乃威之所服德之所著夫物且喬然嗟若  
戎虜戴仁含義孰敢顛侮故強者以款弱者以附老者  
以居少者以哺蠢蠢萬類悉囿皇度彼其角瑞駟駟白  
鴈朱鷺赤鳥文狸黃熊玉兔莫不矜其神異著為靈符  
曷足以威遠人來荒裔有若今日之盛乎然我

聖皇猶且謙抑溫恭益勵于治不貴遠物以為德累脩六  
府正三事作禮樂招俊乂咏騶虞歌麟趾故茲獸之來  
亦將蓄之苑囿俾與百獸之蹢躅待九奏而率舞昭乎  
服遠之威靈庶物之蕃庶誠宜播之聲詩以詔萬古於  
是臣謹百拜陳辭敢頌以賦

退思齋賦

西蜀蹇公自侍從掌外制累陞吏部尚書進位少師忠  
謹誠亮祇事四朝位望崇顯而公又名其燕休之齋曰  
退思蓋以忠亮自勵也問命英賦之既頌美公之賢且  
托以已志焉賦曰仰

列聖之光命兮爰累陟於崇階歷時歲之嘉泰兮實藉寵  
而承輝既獲志於有遇兮何遑遑而孜孜晨待漏而夕  
休兮惟惕然而有懷巖巖廊廟其高邃兮華珮肅而遠  
迤貳通撥以寅亮兮在變調于化機統百工而均理兮  
曰熙隆於庶績念付托之攸重兮惟宣力而振德敢暇



豫而自休兮以出位而為辭乃端默而凝志兮極圖繹  
於謀為緬姬旦之兼慮兮不遑處以繼之慨鄭公之忠  
讜兮陳十思而戒逸企先憂而後樂兮與垂紳而端笏  
允蹈迪于前軌兮重古人其未亡說嘉謨以啓沃焉畢  
率下而正色鄙衆志之茫昧兮徒貿貿而自嬉百度曠  
而弗飾兮胡能以公而為規慚小子之薄劣兮以師尹  
為具瞻誦雅咏之射思兮願以茲而永監享泮渙之百  
福兮羌有赫其令聞竊灌灌而陳詞兮諒賢智其知言  
冀服膺而弗置兮以退思而書紳

襲封衍聖公賀表

襲封衍聖公臣某伏惟

皇上崇重儒教新建太學規模宏壯超越前古臣忝先師  
之後謹率孔顏孟三氏子孫曲阜縣知縣臣孔公堂等  
詣闕謝恩恭遇

聖駕臨幸又獲侍從以觀大禮誠曠世之奇逢不勝忻忭  
懋戴之至謹奉表稱謝者伏以乾坤清泰廣一統之輿  
圖

聖德昭衍萬年之寶曆光榮及於儒教經始先於辟廱  
厥功告成振耀千古恭惟

皇帝陛下文武聖神剛健中正本天錫之睿資勤日新之

聖學治惟法

祖政在養民至仁允同于堯舜大德克協於禹湯靖邊陲而天威遠振隆治化而文德弘敷以太學育群才之地惟夫子為百世之師壁水杏壇峙赫赫巍巍之締構繡裳珠弁儼申申夭夭之容儀乃勤

鑿輅臨幸橋門祀禮既已加崇諸儒過蒙寵眷授几榻而坐俾講典謨之書進師生而前諭以仁義之訓後三代人君躬行之教正千載明良會遇之時臣某賦性庸愚素無學術託以先師之胄恭逢廟學成感隆恩而祇謝趨上國以觀光深切歡欣傾丹心而向日惟塵拜舞

祝 聖壽以齊天

謚議

大行太皇太后尊謚臣等謹欽遵會同公侯伯五府六部  
都察院等衙門官國公臣輔等議擬進呈臣聞古昔聖  
帝明王君主天下必有聖明之后以隆王室裕及于子  
孫則鴻名顯號垂休無極若塗山啓夏簡狄興商太任  
太姒以隆周室盛德尊稱載諸典籍古今所同也伏惟  
太行太皇太后仁慈貞靜純一端莊德善之懿實由生成  
尤克祗承姆教謹乎珩璜琚瑀之節遵乎詩書圖史之  
規天其申命作配

仁宗昭皇帝自藩邸入正儲宮屢膺冊命克孝克勤克誠  
克儉以肅儀範以奉蒸嘗以贊監國之務以相規謤之  
勤既正位中宮為天下母上奉神明之統下理萬物之  
宜福慶衍於蠡斯慈恩覃於民物暨

宣宗皇帝續承大統以聖子而侍慈闈極親而尊養以天  
下德教之弘益昭孚于萬國迨乎

皇上嗣位

聖慈在上眷愛

聖孫聰明睿智尤勤撫訓事皆稟奉政無側頗提挈綱維  
內外寧肅至於睦宗室求賢才理冤獄寬租賦卹鰥寡

賑饑貧屢降德音而遠方奇異之物雕文刻鏤之器一  
皆禁絕誠諭外戚屏斥貪邪敦尚朴素惟浣濯是御惟  
蠶桑是親德盛名化華夷底平以歌頌太平之治宜長  
樂永隆於孝養而

鑒輿遽至于升遐臣民哀慟如喪厥妣仰惟聖德奚以名  
言夫以誠孝理內治以純正隆母道以莊敬御下以寬  
惠加于四海以明睿裁決正理致治功之熙廣政化之  
昭宣以繼任姒之徽音以啓國家寶祚之隆母儀實垂  
範於天下萬世之遠而仁恩及民如天之育庶物咸遂  
其生叅之輿論宜崇尊謚以享廟祀底于億萬斯年臣

等謹稽禮文徵古謚法宜天錫之曰

憲仁慈孝貞明欽肅配天齊聖昭皇后臣等再拜稽首謹  
議

金齒新學詩

正統十年春金齒改建儒學成南詔之地惟金齒最遠  
去京師萬餘里

國朝設兵衛命將以重兵守之諸夷款服民用寧輯乃者  
守臣言宜設學校立師儒教之詩書禮樂詔從其言建  
學于城之中以所舉儒士余穀為訓導穀明經有文行  
士皆尊仰之然學之初建地稍卑隘會靖遠伯王公驤

尚書徐公晞侍郎侯公璉守雲南都督沐公昂征麓川  
叛酋駐師金齒以學宜遷于城西高亢寬閒之地經營  
未就而刑部侍郎楊公寧來叅戎務與黔國沐公斌謀  
必欲亟成於是都指揮胡誌李昇指揮同知趙忠等相  
與協謀一心工力財用悉為之備遂改築之至是乃成  
夫子廟而廡戟門明倫堂齋舍廚庫皆以新易舊規制  
有加士子喜而相語曰

聖天子嘉惠遠夷尊崇孔子之道建學以師教我敢不知  
所自勉宜有言以頌德紀功垂示後來穀致書以詩為  
請詩曰



述矣金齒西南之裔高城言言守以兵衛其人雖夷寧  
不循教乃作學宮

天子有詔維此學宮地隘而卑武臣文臣曰驥曰晞曰璉  
與昂始謀遷之曰斌黔公暨少司寇欲亟成之謂不可  
後衛將曰誌暨昇與忠疊疊勤勤協贊厥功既成學宮  
渠渠士子萃止誦詩讀書乃相告言學以進德新我學  
舍我游我息嗟嗟士子我維爾嘉揄揚厥休我詩爾歌  
以紀成績以頌

聖德尚告後人其思無斁

元翰林學士承旨危公畫像贊并序

危公大樸元時累官至行中書左丞翰林學士承旨此  
像為禮部尚書時作也英於公同邑里生晚不及識公  
今公之曾孫山典順昌縣丞嘉善以茲像示英再拜而  
為之贊

偉哉危公神和氣融蘊於內者其德充發於外者其學  
博其才雄其文章之工宜其剔歷顯要位高而望隆夙  
俾公之大名幸觀公之遺容寧不肅然加敬慨然景慕  
於無窮也耶

尚書劉公畫像贊

有序

元中書工部尚書金谿劉公諱傑字良甫以進士起家

新建丞陞宜陽縣尹以政最累陞至中臺御史又六陞  
為尚書數言事忤執政者因謝病以集賢學士致仕歸  
至宜陽宜陽之人德公之深留公居其邑焉公之從孫  
令謨全緒在金谿者藏公遺像甚謹而英則公之外甥  
壻也瞻仰起敬而為之贊

公之學行冠乎群英公之名位列于六卿言論凱切志  
則莫行幡然歸休遠辱辭榮瞻公遺像仰公大名清風  
凜然百世如生

章處士畫像贊

稽山巖巖先生攸居黃冠野服蕭雍自如師古人之行

讀古人之書其實也若虛其守也似愚其視物若浮雲  
重道如璫璣故能處約自晦而不願世之軒冕隨適而  
安豈顧人之毀譽所以知之者謂其嘉趣無營不知者  
謂其藏智有餘噫在唐虞有擊壤之叟漢代有垂綸之  
徒以逍遙治世夷猶江湖惟先生其然歟

陳思孝畫像贊

觀其容儀郁然而秀考其學術靡不精究下視斯水上  
軼史檣翱翔鳳池孰與為偶惟德是充以道自守卓哉  
斯人寔維我友

古朴子贊并序

浦城陳遜必恭篤厚之士也第進士為監察御史陞雲南叅政治尚簡靜平生無所矯偽於凡世之權要未嘗阿悅取容與人交以信義蓋確守古道而不易者人稱為古朴子遂以自號余慨夫世之人多務澆薄而必恭獨如此其可嘉也為之贊曰

太樸既散巧偽日滋顧風靡然孰覺其非猗嗟必恭樸其性資既登憲臺遂佐藩維弗苛以勵弗詭而隨善政之施令聞四馳我嘉斯人作為贊辭彼偷薄者碌碌於時視吾必恭可為之規

王將軍畫像贊

王公諱廣字廣卿金溪東溪人元季以賢雄奮身興義  
為鄉保障居民賴以安堵天兵下江南首率兵歸附以  
戰功累官至雷州衛千戶階武德將軍卒子均德襲贈  
公明威將軍指揮僉事公之孫宗紀以公畫像徵贊贊  
曰嗚呼將軍當元之季呼鷹挽弓奮挺而起獨舉義  
兵保衛鄉里迨歸

天朝寵加名位嗚呼將軍壯哉其志仰瞻遺容尚有生氣  
宜夫子孫寶藏百世

王秉材畫像贊

服時人之服異時人之所欲耕負郭之良田積圖書之

萬軸時把卷而歌吟方夷猶而自足或適興於絲桐或  
娛情於棋局睇天際之孤雲覽籬邊之芳菊蓋將逍遙  
徜徉而離夫世之榮辱恐徵書見招而不得栖遲於巖  
谷也

雪崖先生哀誄

維洪武己巳五月十又四日雪崖先生卒後若干年是  
為永樂壬辰先生以嗣子幼孜累官在禁近典掌制誥  
朝廷特推恩贈奉直大夫右春坊右諭德沒而光榮矣先  
生姓金氏字守正雪崖其號也世為新淦儒家平生孝  
友端直淹貫六經旁及子史百氏之書晝夜講誦不輟

所造詣益深故作為文章典贍有法洪武戊午以薦為  
郡學訓導始至戒諸生去矜肆以收其放心諸生皆唯  
唯蹈規矩先生為敷論仁義忠信孝弟之說於人多所  
造就為東南師儒之冠一日邁疾語諸生曰吾年止此  
矣取筆書別親友及訓子詩沐浴具衣冠端坐而逝袖  
色自若遠近奔走哭弔者道路相望嗚呼先生學邃而  
才充德醇而行高所不充者位耳然位不充而垂澤者  
遠於今日而見之矣故聞先生之風者莫不慨慕悲悼  
迺述撫遺行陳以誅文其辭曰  
塗陽之壩山川  
炳靈篤生多賢有偉先生孝友醇和謹飭莊敬亦銳其



才挺秀拔穎爰及弱冠奮勵有立取友輔仁遑遑汲汲  
肆其涵泳外物以祛曾參真魯回也如愚視有若亡持  
以謙虛典謨誓命禮樂風雅將心於茲夙夕不舍魯史  
筆削義圖妙微末乃有得極于根底旁蒐百家以約旨  
趣所資既深爰博其取辭以義暢肆而淵宏金鍾大鐺  
其音鏗訇著作之富昭于盛時乃振鳴鐸以居臯比師  
嚴道尊諸生肅祇仁義忠信訓言諄諄荀楊之戾孟軻  
之醇辯其邪正欲以分允矣先覺援古正今作我程範  
為時所欽嗚呼先生何數之速白駒入夢少微夜昏梁  
木其摧永慨斯文嗚呼哀哉世尚恢詭於惟先生素行

完美屬續之夕凝神定氣啓手啓足遺言在耳嗚呼哀哉先生云亡誦茲遺言涕泗其滂學不究用澤流乃長憲憲令子克孝克類承國寵恩光及幽閼先生雖亡抑又何愧亦孰不懷哲人其萎高山仰止載誦其詩嗚呼哀哉累德陳辭百世之下先生是思

故彭汝器誄有序

維永樂八年九月丙寅翰林脩撰安城彭君汝器以鳧從居北京得疾而卒冬十月返其柩于故山遠近聞者莫不痛悼來會哭而祭奠之汝器蓋忠信孝友人也予與同登進士選讀書秘閣凡二十八人而趙擢為脩撰

則予與汝器凡四人耳汝器幼學于鄉及為縣學弟子  
已有盛名其兄汝舟為閩清令坐事卒于行伍以次重  
兄當代汝器奮身請行會赦免歸益肆力於學遂登第  
膺秘閣之選為文章名重一時故擢官至脩撰其來北  
京也僅年餘而卒焉嗚呼汝器今不可見矣所存者惟  
文章耳然亦未盡其才也使其求年所造就當何如哉  
迺述撫其行私為之誄其辭曰

嗚呼彭君少有奇志直亮坦夷不事恢悅動循軌則行  
謹孝弟念我手足中道殞傷挺身赴難隸彼戎行天聽  
不違大沛恩澤式遄來歸砥礪名德稽經輒史肅然冥

思美玉弗售明珠潛輝其實莫掩蜚聲四騰鄉舉六行  
賓于大廷遂擢上第登崇西清五緯耀芒奎文萃精爰  
彼寵命列職太史載筆屬車度淮踰泗東望太山北覽  
燕薊大放厥辭擬于班揚胡為痼疾糾纏膏肓罹此凶  
厄溘焉云亡嗚呼哀哉公之抱負佩仁履義棟梁之材  
瑚璉之器既用于時胡嗇其施孰不悼惜涕泣如雨思  
其步趨燕處笑語今我莫覩失我規矩仰瞻彼蒼邈爾  
幽遠物有不齊是理之變回也命夭伯牛數蹇於乎哀  
哉君其亡矣歲月如馳大江東流逝者莫期緬望故山  
靈車夜歸里巷悲愴幼穉號呼篋有遺文室藏故書百

世之下存者在茲於乎哀哉

吊陳先生文

予嘗至番陽自浮梁山中道經德興父老言前令陳公  
孟藻德政如卓魯民受其惠惜去而亡矣後之為縣者  
皆貪刻苛猛予聞而悲之是時公歿久矣予與公之子  
敬宗登進士同官于朝又得備考公之行誼追悼往昔  
為文以遺諸人俾永其思其詞曰

余浮菴以遠征兮歷先生之故治遺老泣而告余兮嗟  
後時已十祀心悵恍以永懷兮霄耿耿而不寐顧惟此  
而徬徨兮嗟若先生豹隱幽壑兮虬潛重溟處困而亨

兮藏晦以明志熙怡愉兮其蘊則宏望之興周兮說達  
于殷處此下邑兮不驟以進綰章與綬兮佩仁履信彼  
狡之氓兮欺則弗忍澆者既敦兮鷺者益遠嗟哉其此  
去兮卒莫我返鳩臬翱翔兮鷹鷂利吻張牙互赫兮爭  
餽肆忿囂哢而群處兮既飲且吐登狼莠以為饋兮毀  
棄黍稷衆雛嗷嗷兮疾餒待哺夫豈不懷先生兮如失  
父母故世之所惜兮謂先生內實無疾而其所悼兮曰  
年未中壽材宜棟梁兮胡乃橐朽車可任遠兮輪折而  
覆道才可以經濟兮施則未究顏夭而冉疾兮人孰其  
詬彼或幸其災兮何疾美而夸醜惟尼父之興歎兮曰

善人吾弗覲余故撫膺而深喟兮獨揮涕以隱憂已矣  
乎先生不見諒達人其大觀兮處順而知變視有形而  
終化兮理固宜然彼崆峒與玄圃兮杳而莫攀彭聃之  
矯矯兮今安在焉惟死有所不抵兮斯乃為貴黔婁終  
屨兮柳下惠之薄仕必子賤之有譽兮仲卿之有嘉惠  
既在古以為然兮豈今世之能違故余祛殷惑之慘戚  
兮以申先生之私賜列星於冥漢兮雲霧溺而神馳巫  
咸為余致虔兮招遺靈而來歸奠桂酒與椒漿兮重慨  
想於昔時中鬱抑而坎坎兮乃斐然而陳辭庶百世之  
下兮惟先生之是思

梁先生哀辭

魯王府紀善泰和梁先生以宣德甲寅七月卒于魯城之官舍王悼惜之魯人為之哭吊訃聞京師士大夫皆悲而哀之嗚呼先生何其感人之深耶先生以明經起家瑞州郡學訓導陞溧水汭溪二縣學教諭蜀獻王聞其名奏擢為紀善再改魯府先生孝友介特不偶於流俗而論議侃侃淹貫經史為文章純正有法度教生徒率循規矩輔王以仁義正而不阿先生之學行蓋如此初先生之兄用之累官至翰林侍讀以雄文碩學擅名於時先生實與相埒無何侍讀公歿人莫不痛悼所幸



者先生存耳今復不可見矣悲夫世之士求如先生者  
蓋未之多得也人人哀之悼之而為之痛惜者宜矣昔  
李育為岐王府紀善蘇文忠公稱其篤實持正能以經  
術輔導其卒哀之以辭而予之哀先生亦不能忘情於  
言也乃為之辭先生諱混字本之別號坦庵辭曰

繫彼魯藩扶群僚兮嗟惟先生志獨超兮屹如山嶽聳  
嶢峣兮剛介拔俗鄙時曹兮學究墳典涉風騷兮詞源  
浩浩奔洪濤兮繼漢廷固追枚臯兮持鐸庠校淑俊髦  
兮陳論德義立王朝兮夫何溘然解天綬兮嗟哉先生  
德望昭兮昔與元方同遨遊兮翩翩雙鳳翔九霄兮今

不可見增悲號兮大江東逝何滔滔兮落日欲沒風蕭蕭兮魂何之兮不可招兮我懷<sup>先生</sup>心忉忉兮

祭大學士胡公文

嗚呼儒者之遭遇於世名聞赫然而四馳必文章足以黼黻皇猷功業足以銘諸鼎彝則庶幾其無愧惟先生以純靖之德含宏之量明偉正大之學雄深雅正之辭當天下一文明之日而特受

聖主之知擢居翰苑職掌絲綸而先生則感荷恩眷自以為千載一時乃小心祇翼而猷納論思故不特文章制作之盛有以藏之金匱刻之琬琰傳之四夷至于輔導

青宮益盡其寅畏扈從平胡則協贊其謀為勤勞益著  
而位望兼美遭遇之盛惟先生其寔宜方期從容館閣  
享茲安樂而遽焉一疾與世永違

聖主哀悼為之加封爵錫美謚昭其潛德千載之下赫然  
有輝嗚呼先生之始終若此天下之人孰得如是所慨  
念者年未躋乎耆頤哲人云亡音容日遠後生未學亦  
孰為之表儀斯文山斗之仰實中心之所懷致此薄奠  
以伸予悲

侍講王先生哀辭

有序

嗚呼汝嘉先生其亡矣先生亡京師之人聞者皆悼惜

與常所交游者奔走會哭既殮視還于吳又相與祖奠而哭之嗚呼先生何其使人哀之深耶先生蓋淳謹之士也經明學博為文章雅正自縣學官入翰林為五經博士陞侍講在翰林蓋十餘年矣年且最高於制作禮文之事能博考精究屢執文衡較天下科貢則至公而無私先生之志蓋老而益勤也其篤行如此於其亡亦宜乎人皆哀之深也夫年高如先生又官至侍從為詞臣其始終固無憾矣然老成凋喪今後幾何人哉嗚呼先生不可見矣予與先生相知且深哀之不可無言乃為之辭以摅予情先生諱進汝嘉其字也卒之年七十

有二辭曰

先生之德清且醇兮中心樂易恒旼旼兮稽經博古學  
有源兮其蓄淵宏發於言兮藹然成章雅而頌兮推厥  
善道施諸人兮暨登詞垣厥聲振兮屢進華秩承殊恩  
兮髣髴蟠蟠益祇勤兮享有壽考五福臻兮俯仰疇昔  
為酸辛兮往者莫返隔九原兮我思悠悠淚沾巾兮

詹績尚志兄弟字說

古者子生三月父母命之以名及冠三加而字之責其  
成人也夫幼則名長則稱其字字所以表而出之豈不  
重於名乎以字為重則其所望者深矣詹氏世居金谿

邑治之南世為大族有耆老用昌一子曰文善文善之  
子曰景寧曰績曰望曰本則景寧之子也予至南京之  
明年夏績來請曰績三兄弟名而無字幸字之而申其  
義予與詹居同里且交於用昌文善其請可已於言乎  
乃告之曰績之義功也事業也人之立功名建勲業者  
豈易言哉必先立志志立則功業有成績乎字汝曰尚  
志當奮然自立其志書曰功崇惟志是也望者瞻望也  
士之賢者衆必尊之仰之望之然所謂賢者非有德君  
子乎惟君子斯足副衆之所望也望乎字汝曰尚賢必  
友其士之賢者以進其德以修其業則孰不尊仰之至

詩曰令聞令望豈弟君子四方為綱是也本根本之謂也人之生天賦以性能全其理則不失其本然之善然非加以省察則肆情縱欲而其本然者亡矣本乎字汝曰尚省必戒慎恐懼無少放誕則身脩而德成傳曰三省吾身是也吾以是字汝兄弟必朝夕兢惕無怠無縱無傲慢游惰則其進至於高明遠大無愧於為成人無忝於乃祖乃父必招其令聞大振厥家而予所以字之者庶幾無負矣續乎望乎本乎可不顧名思義行之終身哉乃書以貽之

十八學士圖引

唐太宗文皇帝在藩邸時開天策上將府招延天下文學之士以府屬杜如晦記室房玄齡虞世南薛收文學褚亮姚思廉主簿李道玄參軍蔡允恭薛元敬顏相時諮議典籤蘇勗中郎于志寧軍諮祭酒蘇長倉曹李守素助教陸德明孔穎達信都蓋文達戶曹許敬宗俱以本官兼學士分番更直文皇與之諮議政事討論經籍禮待優厚又使庫直闔立本畫像褚亮為之贊號十八學士得與其選者時人榮之以登瀛洲目之也後人仰慕其風致多托諸毫素以寓十八人之像此則閩人林惟堅為閩縣幕官鄭君貴讓所作也貴讓請言以序之



予披閱再四觀十八人者或立或坐或吟咏或談笑或  
俛首而視或拄頰而若聽者意態各有不同雖莫知其  
為誰然考之其間有以德量稱者以文學進者有善於  
籌謀者富於才藝者故文皇尊寵之至是以俱有左右  
之功匡贊之力致文皇有天下為治底於極盛者也非  
文皇好賢愛士志於大有為者豈能得士如此哉後世  
圖而傳之不亦宜乎雖然十八人固才傑之士也而論者  
謂其人之賢否有砒砒美玉之相間此固有可議者矣  
然慨仰當時際遇之盛如雲龍鳳虎之相從亦有未易  
及者也觀者亦豈無所歆歎且因其人之賢與否而為

勸戒也哉或曰開元中嘗圖張說等十八人於含象亭  
亦謂十八學士此圖近似之然世多不傳惟登瀛圖好  
事者往往寫之故為之序云

